

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNO TUŽILAŠTVO  
ZENIČKO-DOBOJSKOG KANTONA**

**Broj: T04 0 KT 0047412 21  
Zenica, 20.05.2025. godine**

**OPĆINSKOM SUDU U VISOKOM  
-Sudiji za prethodno saslušanje-  
VISOKO**

Na osnovu člana 45. stav 2. tačke i) u vezi sa članom 241. stav 1. Zakona o krivičnom postupku Federacije Bosne i Hercegovine ("Službene novine Federacije Bosne i Hercegovine", broj: 35/03, 37/03 ... 74/20, u daljem tekstu "ZKP F BiH"), podižem

**O P T U Ź N I C U**

**Protiv:**

**I. Đ.**, neosuđivana, prema vlastitom kazivanju ne vodi se drugi krivični postupak, zastupana po advokatu Arminu Ruviću iz Sarajeva;

**što je:**

dana 08.08.2021. godine, oko 00,30 sati, u Olovu, upravljajući putničkim motornim vozilom marke „...“ tip „...“, registarskih oznaka „...“, krećući se magistralnim putem ... iz pravca Sarajeva u pravcu Tuzle, nije se kretala vozilom desnom stranom kolovoza u smjeru kretanja na tolikoj udaljenosti od desne ivice da, s obzirom na brzinu kretanja, stanje i osobine puta, ne ugrožava druge učesnike u saobraćaju i sebe ne izlaže opasnosti, svjesna da zbog toga može nastupiti zabranjena posljedica, ali je olako držala da ona neće nastupiti ili da će je moći spriječiti, pa postupajući suprotno odredbama člana 39. stav 2. u vezi sa stavom 1. Zakona o osnovima bezbjednosti saobraćaja na putevima u Bosni i Hercegovini ("Službeni glasnik Bosne i Hercegovine", brojevi: 6/2006, ..., 88/2023) vozeći tako u noćnim uslovima vožnje na dijelu saobraćajnice koja se nalazi u blagoj lijevoj krivini u mjestu Bjeliš, ispred ulaza u tunel Bjelava, vozilom potpuno prešla desnu ivicu kolovoza i time tako ugrozila bezbjednost javnog prometa, jer je desnom prednjom stranom vozila kojim je upravljala ostvarila kontakt sa betonskim blokom postavljenim na ulazu u obilaznicu oko tunela „Bjelava“ koji je obilježen znakom privremene prepreke na cesti i smjerom preusmjeravanja saobraćaja na lijevo, uslijed kojeg udara se vozilo odbilo i prešlo na lijevu stranu, a saputnica Š.M., koja se nalazila na zadnjem sjedištu vozila, zadobila teške tjelesne povrede u vidu preloma vratnih prešljenova od 3 do 5,

**dakle**, kao učesnik u saobraćaju na putevima koji se ne pridržava saobraćajnih propisa, time tako ugrozila javni saobraćaj, da je dovela u opasnost živote ljudi, pa je zbog toga prouzrokovala tešku tjelesnu ozljedu jedne osobe,

**čime je** počinila krivično djelo Teška krivična djela protiv sigurnosti javnog prometa iz člana 336. stav 3. u vezi sa članom 332. stav 3. u vezi sa stavom 1. Krivičnog zakona Federacije Bosne i Hercegovine ("Službene novine Federacije Bosne i Hercegovine", broj: 36/2003, 21/2004, ... , 31/2023, u daljem tekstu "KZ F BiH").